

Women's Club of Aruba ta despedi di Life Member Lilla Williams

MIEMBRONAN di Women's Club of Aruba (WCA) cu tristeza grandi den curason ta bini hunto awe pa despedi di Sra. Lilla Williams cu a sorprende nos cu su partida.

Lilla Louise Williams a nace 22 di januari 1935 y el a traha te na su pensioen na Post Kantoor San Nicolas y despues el a keda traslada pa Oranjestad. El a bira miembro di nos club na aña 1991 y a keda fiel den su trabao di boluntario te na ultimo. Su amor pa nos grandinan a hib'e traha cu e comision di Welfare unda e tabata bishita y hunga bingo na San Pedro Paviljoen na Playa, Huize Maris Stella na Savaneta y Centro di Cuido na San Nicolas. E tabata stima nos muchanan y tabata miembro di comision di Dress a Child pa varios aña pa yuda specialmente muchanan di su bario Dakota.

Lilla tambe a duna su tempo liber na e Comision di Tene Aruba limpi y despues cu Medio Ambiente goes to School. Den tur otro comision di club, Lilla tur ora tabata dispuesto pa yuda boluntariamente. Den e periodo di 1995-1996 bou presidencia di Marilu de Veer, Lilla tabata forma parti di directiva di WCA como Member-at-Large encarga cu e pagina di 'Sunshine' pa pone tur noticia alegre y of tristo concerniente miembrecia den e boletin di tur luna.



Na aña 2022, Lilla a keda reconoci como Life Member den nos club, ya cu el a cumpli 30 aña ta haci trabao di boluntario y tabatin mas cu 80 aña di edad.

E tabata loyal na e reunionnan general di miembrecia un biaha pa luna. Aki Lilla a haya e nomber di "Sexy Lady" como semper e ta bin bisti masha bunita mes cu matching tas y sapat'i hilchi halto di 10 cm. Lilla su hobby tabata cose y p'esey e mes tabata cose tur su bistanan na e moda actual y segun e tema indica di e GMM.

Su tripanan pa New York tabata special pa e cumpra telanan bunita y sapato cu tas cu ta match. Su cashinan tabata yen di sapato y e mes ta bisa cu e ta competi cu e Filipino Imelda Marcos.

Semper tabata un placer pa mira Lilla cana drenta bisti masha bunita mes y su sapat'i hilchi halto di kita sombre. Sinembargo



Lilla tabata un persona masha humilde y agradabel, cu un curason grandi, su cariño tabata contagioso, semper e tabata contento y sin riparo. Lilla, bo a subi bo ultimo vuelo sin buelta, pero bo ta laga atras bunita recuerdonan, tanto pa bo colega miembronan como pa bo sobrinonan stima y resto di famia. Awo nos di WCA cu hopi tristeza ta aki pa despedi di nos Life Member stima. Bo recuerdonan lo keda graba den nos historia y den nos curason. Sigui luci den e hardin di nos Señor. Sosega na Paz, Lilla stima!

Di parti di tur e miembronan di WCA, nos mas sincero condolencia na su rumannan y respectivo famia, tur sobrino- y sobrinanan. Hopi forsa na boso tur y laga e bunita recuerdonan di Lilla sirbi di consuelo pa boso.



SABIDURIA DEN NOS ALEGRIA

Skirbi pa Ruthy "Lady Ruth" Vrieswijk-Bergen

Y asina ya nos ta na mitar di e prome luna di e aña 2026. Aruba a conose su prome baby di aña y su prome mortonan den trafico di cual hopi ta lamenta, pero, si ta bay stuur bao influencia di alcohol y core auto duro cosnan malo por pasa. Unda e fayó ta sinta, den esnan cu no ta stima nan mes prome pero ta laga accionnan di otro determina nan reaccion? Hopi no tin self control?

Lady Ruth tambe a pasa den situacionnan un crenchi fastioso cu famia cu no ta ruman, na cambio di aña, cu no tawatatin self control, cu a mete den asuntonan di su mayornan cu a caba di fayece, cu gritamentonan mahos fei sla, nan no tawata tin self

control y a mete conciente of inconcientemente y despues ta nenga bisa cu nan no a mete. Ufffff! Y a purba bolter e asunto como sifuera ta nan ta e victimanan. Enfin, ela gewoon bin ariba awor aki, pasobra ta tur rond di mundo tin cosnan fei sla ta pasando. No ta sconde secreto bau kokodek mas, hahahaha y hopi ta lubida cu tur berdad ta sali na cla. Ta manera tin algo hopi negativo den e aire rond di nos y no ta tur por handel cu stress of cu situacionnan di nan mes y ta mete den situacionnan di otro. Y hopi biaha tur esakinan pa via di placa placa placa, manera e poema inolvidabel di amiga Filomena Wong awe dfm. Nos ta aki na mundo pa siña di otro y pa ta un bon ehempel pa otro, of no?